



Sumáriu Kazu
Tribunál Distritál Baukau
Juñu 2019

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida. JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 15

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	8
Artigu 146 KP	Ofensa ba integridade fízika grave	1
Artigu 145 KP no artigu 2 (1 letra b) no artigu 20(1) hosi Lei Nú. 5/2017	Ofensa ba integridade fízika simples no arma brankas	1
Artigu 19 hosi Lei Nú. 5/2017	Arma brankas	1
Artigu 146 KP no artigu 19 hosi Lei Nú. 5/2017	Ofensa ba integridade fízika grave no arma brankas	1
Artigu 253 no 145 KP	Roubu no ofensa ba integridade fízika simples	1
Artigu 259 KP	Danu agravadu	1

Artigu 334 KPS (Kódigu Prosesu Sivíl)	Embargu judisiál no extrajudisiál	1
Totál		15

2. Totál desizaun ne'ebé JSMP monitoriza: 12

Tipu desizaun	Númeru
Pena prizaun (Artigu 66)	1
Suspensaun ba prizaun nia ezekusaun (Artigu 68 KP)	6
Suspensaun ba prizaun nia ezekusaun (Artigu 68 KP) ho indemnizasaun sivíl	2
Suspensaun ba pena prizaun nia ezekusaun (Artigu 68 KP) ho regra konduta - Artigu 70(g)	1
Suspensaun ba pena prizaun nia ezekusaun (Artigu 68 KP) – Omologa	1
Absolve	1
Totál	12

3. Totál kazu sira ne'ebé adia tuir JSMP monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 3

B. Deskrisaun sumáriu ba desizaun kazu sira ne'ebé JSMP monitoriza:

1. Krime ofensa ba integridade física simples ho natureza violénsia doméstika

Nú. Prosesu : 0023/19.PDBAU
 Kompozisaun Tribunál : Singulár
 Juis : Dr. Afonso Carmona
 Prokuradór : Dr. Ambrosio Rangel Freitas
 Defeza : Dr. Gregorio de Lima
 Desizaun : Pena prizaun tinan 1 suspende ba tinan 2 no indemnizasaun sivíl
 US\$100.00

Iha 04 Juñu 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu TdS hasoru nian feen, iha Distritu Lautem.

Akuzasaun Prokuradór

Prokuradór akuza katak iha 02 Maiu 2018, iha oras tuku 17:00 lorokraik, arguidu duni lezada ho tudik maibé duni la toman nune'e arguidu foti fali fatuk no tuda kona iha lezada nia kabaas sorin karuk. Aktu ne'e rezulta lezada sofre moras no bubu iha kabaas. Antes ne'e, arguidu no lezada diskute malu kona-ba arguidu atu hola tan feto seluk.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to' o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente ba faktu sira iha akuzasaun no deklarata katak momentu ne'ebá lezada mak tuda uluk dala ida iha arguidu nia liman kabun. Tanba ne'e, arguidu foti fatuk ida no tuda ba parede mak fatuk refere katik kona fali ba iha lezada nia liman, besik kabaas sorin karuk. Arguidu rejeita uza tudik ameasa lezada. Arguidu hatutan katak primeiravés mai hatan iha tribunál, seidak di'ak malu ho lezada no hela ketak ho lezada to' o agora.

Iha parte seluk, lezada mós kontinua konfirma faktu sira iha akuzasaun no deklarasaun arguidu nian katak to' o agora sira seidak di'ak malu no hela separadu to' o agora. Entretantu lezada rejeita arguidu nia deklarasaun ne'ebé hateten katak lezada mak tuda uluk arguidu.

Alegasaun finál

Prokuradór haktuir katak arguidu konfesa parsialmente ba faktu sira iha akuzasaun maibé lezada konfirma tomak faktu sira iha akuzasaun ne'e. Arguidu seidak di'ak malu ho lezada, ne'e hatudu katak arguidu la arrende ninia hahalok no tribunál tenke foti medida ne'ebé forte hodi eduka arguidu iha futuru. Tanba ne'e, husu ba tribunál atu kondena arguidu ho pena prizaun tinan ida suspende ba tinan rua.

Enkuantu defeza haktuir katak arguidu konfesa parsialmente ba faktu sira no deklarata katak aktu ne'e arguidu foin primeiravés halo agresaun hasoru lezada. Tanba ne'e, husu ba tribunál fó pena ne'ebé adekua ba arguidu.

Desizaun

Depoide avalia faktu hotu tribunál prova katak arguidu lori tudik duni lezada maibé lezada halai sees tiha nune'e arguidu lori fatuk tuda tuir dala ida no kona iha lezada nia kabaas parte sorin karuk. Tribunál konsidera katak arguidu la hatudu arrendimentu mezmú nune'e tribunál konsidera mós arguidu foin primeiravés mai hatan iha tribunál no sirkunstánsia atenuante seluk. Bazeia ba prova no konsiderasaun sira, tribunál kondena arguidu ho pena prizaun tinan ida suspende ba tinan rua inklui selu indemnizasaun sivíl US\$100.00 ba lezada. Aleinde ne'e, kondena arguidu selu kustu judisiál US\$40.00.

2. Krime ofensa ba integridade fízika simples ho natureza violénsia doméstika

Nú. Prosesu : 0004/19. BCBCV
Kompozisaun Tribunál : Singulár
Juis : Dr. Jose Escurial
Prokuradór : Dr. Gustavo A.M. da Silva

Defeza : Dra. Agostinha de Oliveira
Desizaun : Pena prizaun fulan 3 suspende ba tinan 1

Iha 06 Juñu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DdC hasoru nia feen, iha Distritu Baukau.

Akuzasaun Prokuradór

Prokuradór akuza arguidu katak iha 02 Fevereiru 2019, iha oras tuku 20:00 kalan, arguidu fila husi joga karta no bainhira to'ó uma arguidu basa dala ida iha lezada nia hasan sorin loos.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'ó tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak desde forma família iha tinan 2009 arguidu foin primeiravés baku lezada. Arguidu deklarata katak arrepende ona ninia hahalok ne'e no to'ó agora la baku ona lezada.

Iha parte seluk, lezada mós konfirma faktu sira iha akuzasaun inklui reforsa liután ho arguidu nia deklarasaun katak arguidu foin primeiravés baku lezada no to'ó agora arguidu la baku ona lezada.

Alegasaun final

Prokuradór haktuir katak tuir loloos arguidu fó prioriedade atu atende nesesidade família nian la'os ba joga lakon hotu osan no fila mai komete fali violénsia hasoru lezada. Tribunál tenke foti medida ne'ebé forte hodi prevene arguidu nia hahalok iha futuru. Bazeia ba konsiderasaun hirak ne'e, husu ba tribunál atu kondena arguidu tuir konviksaun tribunál nian.

Aleinde ne'e, defeza mós entrega ba tribunál atu tetu faktu sira hotu no deside tuir tribunál nia konviksaun tanba konsidera arguidu konfesa faktu hotu iha akuzasaun, arguidu hatudu arrependimentu, di'ak malu ona ho lezada no primeiravés baku lezada.

Desizaun

Depoide avalia faktu hotu, tribunál prova katak arguidu fila ba uma husi joga karta no basa dala ida iha lezada nia hasan sorin loos. Tetu ba sirkunstánsia atenuante husi kazu ne'e hanesan arguidu konfesa, arrepende ninia hahalok, to'ó agora la baku ona lezada no primeiravés mai hatan iha tribunál, nune'e tribunál kondena arguidu ho pena prizaun fulan tolu suspende ba tinan ida.

3. Krime ofensa ba integridade fízika simples ho natureza violénsia doméstika

Nú. Prosesu : 0037/19. BCBCV
Kompozisaun Tribunál : Singulár
Juis : Dr. Jose Escurial
Prokuradór : Dr. Gustavo A. M. da Silva
Defeza : Dra. Agostinha de Oliveira
Desizaun : Pena prizaun tinan 1 suspende ba tinan 2

Iha 06 Juñu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DdC hasoru nia feen, iha Distritu Baukau.

Akuzasaun Prokuradór

Prokuradór akuza arguidu katak iha 15 Marsu 2019, oras tuku 08:00 dadeer, arguidu ho lezada diskute malu kona-ba osan selu eskola oan nian no arguidu basa dala barak iha lezada nia hasan sorin loos no sorin karuk, nune'e rezulta bubu no moras. Arguidu mós tuku dala barak iha lezada nia kotuk laran no tebe dala ida iha lezada nia kidan, rezulta kotuk laran no kidan moras no bubu tanba ne'e, lezada ba halo tratamentu iha PRADET Baukau.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu ne'ebé mak prokuradór imputa ba nia no deklarata katak arrepende ninia hahalok. Arguidu promete sei la repete ninia hahalok ne'e iha futuru. Arguidu deklarata katak primeiravés mai hatan iha tribunál, di'ak malu ona ho lezada no serbisu hanesan badain-uma ne'ebé sai sustentadór prinsipál ba nia família.

Aleinde ne'e, lezada konfirma faktu sira iha akuzasaun no deklarata katak fila husi tratamentu iha PRADET, liutiha semana ida mak rekupera filafali. Lezada mós konfirma ho deklarasaun arguidu nian katak sira di'ak malu ona.

Alegasaun finál

Prokuradór konsidera faktu sira iha akuzasaun provadu. Tanba ne'e husu ba tribunál atu fó pena ne'ebé todan tuir konviksaun tribunál nian atu eduka no asegura arguidu la repete ninia hahalok iha futuru. Prokuradór afirma katak maski arguidu mak sustentadór ba família la signifika rezolve problema liuhusi violénsia.

Entretantu, defeza konsidera arguidu konfesa, kooperada di'ak ho justisa no primeiravés mai tribunál. Tanba ne'e, husu ba tribunál atu aplika pena ne'ebé justu ba arguidu.

Desizaun

Depoide avalia faktu sira, tribunál prova katak arguidu basa duni dala barak iha lezada nia hasan sorin loos no sorin karuk. Arguidu mós tuku dala barak iha lezada nia kotuk laran no tebe dala ida iha lezada nia kidan. Tribunál tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan tribunál no di'ak malu ona ho lezada. Bazeia ba konsiderasaun hirak-ne'e tribunál kondena arguidu ho pena prizaun tinan ida suspende ba tinan rua.

4. Krime roubu no ofensa ba integridade fízika simples

Nú. Prosesu : 0029/18. LASIC
Kompozisaun Tribunál : Koletivu
Juis : Dra. Ersilia de Jesus, Dr. Jose Goncalves no Dr. Jose Quintão
Prokuradór : Dra. Remizia de Fatima da Silva
Defeza : Dra. Agostinha de Oliveira
Desizaun : Pena prizaun tinan 2 suspende ba tinan 3 no omologa

Iha 07 Juñu 2019, Tribunál Distritál Baukau prezide julgamentu leitura akordaun ba krime roubu no ofensa ba integridade fízika simples ne'ebé envolve arguidu Jacinto Carneiro da Costa Fernades hasoru lezada Bernadete Mouzinho no Fabiana Lopes, iha Distritu Lautem.

Akuzasaun Prokuradór

Prokuradór akuza katak iha 14 Abril 2018, oras tuku 04:00 madrugada, lezada Bernadete Mouzinho ho nia alin, Fabiana Lopes la' o hela iha estrada no arguidu husi kotuk rasta lezada Bernardete Mouzinho nia fuuk ba oin rezulta lezada monu ba rai no arguidu hadau no lori halai tiha lezada nia telemovel ho marka *Samsung*. Lezada Fabiana Lopes hakilar “nauk-ten” halo arguidu halai filafali ba lezada sira no tuku dala ida iha lezada Fabiana Lopes nia kotuk laran no tuku dala tolu iha lezada Bernadete Mouzinho nia kotuk laran hafoin arguidu halai liu.

Hafoin akontesimentu ne'e, lezada sira hetan ajuda hosi funsionáriu CNE (Komisaun Nasional Elisaun) ne'ebé tula sira ho kareta hodi ba keixa iha polísia. Lezada na'in rua halo tratamentu iha Sentru Saúde Lospalos. Iha loraon tuir mai, polísia kaptura arguidu inklui prende lezada Bernadete Mouzinho nia telemovel. Kazu ne'e rezolve ona tuir kultura no arguidu fó sala ba lezada sira ho valor US\$1,000.00 ne'ebé kada lezada hetan US\$500.00.

Prokuradór akuza arguidu kontra artigu 253(1) KP kona-ba roubu ho moldura penál husi tinan 3 to'o 10 prizaun no kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa konsiliaun, tribunál halo tentativa konsiliaun ba arguidu no lezada Fabiana Lopes

relasiona ho krime ofensa ba integridade fízika simples tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, arguidu husu deskulpa ba lezada Fabiana Lopes no promete sei la repete ninia hahalok iha futuru. Aleinde ne'e, lezada Fabiana Lopes hakarak deziste nia keixa hasoru arguidu. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime roubu hasoru lezada Bernadete Mouzinho, tribunál kontinua halo prosesu julgamentu.

Produsaun ba prova sira

Iha prosesu julgamentu, arguidu deklara katak iha momentu ne'ebá arguidu ho kondisaun lanu todan no haree lezada sira la'ó iha nia oin. Arguidu rekoñese nia dada duni lezada Bernadete Mouzinha nian fuuk no halo lezada ne'e nia telemovel monu. Bainhira haree telemovel ne'e, arguidu foti tiha telemovel ne'e tanba hanoin arguidu nian. Arguidu deklara katak arrepende ninia hahalok ho nune'e iha 08 Agostu 2018, arguidu ho nia konsiénsia rasik fó sala ba kada lezada ho osan US\$500.00.

Entretantu lezada sira kontinua konfirma faktu sira iha akuzasaun inklui konfirma arguidu nia deklarasaun kona-ba fó sala ba kada lezada ho osan US\$500.00.

Alegasaun final

Prokuradór haktuir katak arguidu provadu komete krime hasoru lezada maski arguidu deklara katak iha momentu ne'ebá nia iha kondisaun lanu. Mesmu nune'e, prokuradór argumenta katak razaun lanu hanesan maneira ida atu dezvia arguidu nia hahalok hasoru lezada tanba realidade arguidu fó sala ba lezada. Ida ne'e hatudu katak arguidu rekoñese nia sala duni. Tanba ne'e, husu ba tribunál kondena arguidu ho pena prizaun tinan ida suspende ba tinan ida.

Enkuantu defeza husu ba tribunál atu kondena arguidu ho pena ne'ebé justu ho konsiderasaun katak arguidu lanu bainhira nia halo aktu ne'e. Aleinde ne'e liu tiha loron balun arguidu hatudu nia arrependimentu liuhusi fó sala ba lezada ho nia alin US\$1000.00, no arguidu foin primeiravés mai hatan iha tribunál.

Desizaun

Depoide avalia faktu sira, tribunál prova katak arguidu lanu no rasta lezada Bernadete nia fuuk ba oin rezulta lezada monu ba rai no telemovel mós monu ba rai no arguidu foti tiha lezada nia telemovel ne'e no lori halai. Tribunál prova katak arguidu lori halai tiha lezada Bernadete nia telemovel. Tribunál mós prova katak arguidu halai filafali ba lezada sira no tuku dala ida iha lezada Fabiana nia kotuk laran no tuku dala tolu iha lezada Bernadete nia kotuk laran bainhira lezada Fabiana hakilar bolu naok-ten, hafoin arguidu halai liu. Tribunál prova katak arguidu

hatudu nia arrependimentu liuhusi entrega ona osan US\$500.00 ba lezada Bernadete no US\$500.00 ba lezada Fabiana.

Tribunál tetu mós ba sirkunstánsia atenuante hanesan arguidu konfesa, arrepende ninia hahalok, di'ak malu ona ho lezada no primeiravés mai hatan iha tribunál. Tanba ne'e, tribunál konklui prosesu krime roubu hasoru lezada Bernadete no kondena arguidu ho pena prizaun tinan rua suspende ba tinan tolu no kondena arguidu selu kustu judisiál US\$20.00.

5. Krime ofensa ba integridade fízika simples ho natureza violénsia doméstika

Nú. Prosesu : 0016/18. LALPL
Kompozisaun Tribunál : Singulár
Juis : Dr. Afonso Carmona
Prokuradór : Dr. Ambrosio Rangel Freitas
Defeza : Dr. Jose M. Guterres
Desizaun : Pena prizaun fulan 6 suspende ba tinan 1

Iha 14 Juñu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu OdC hasoru nia feen, iha Distritu Lautem.

Akuzasaun prokuradór

Prokuradór akuza arguidu katak iha 14 Dezembru 2018, oras tuku 10:00 dadeer, arguidu husu osan hodi sosa tua maibé lezada dehan osan fó tiha ona ba sira nia oan. Hafoin ida-ne'e, arguidu foti ai-pedasuk boot ida no tuda kona iha lezada nia liman kabun sorin karuk rezulta kanek no ran. Aleinde ne'e, arguidu uza besi baku dala ida iha lezada nia liman kabun sorin loos rezulta moras no bubu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu hili direitu nonook. Maibé bainhira iha identifikasaun ba nia identidade, arguidu deklara katak nia foin primeiravés mai iha tribunál no nu'udar agrikultór ho rendimentu kada fulan maizumenus US\$40.00.

Entretantu, lezada kontinua konfirma faktu sira iha akuzasaun no deklara katak sira di'ak malu ona no to'o agora arguidu la baku ona lezada.

Alegasaun final

Prokuradór haktuir katak maski arguidu hili direitu nonook maibé lezada konfirma faktu sira iha akuzasaun. Tanba ne'e, konsidera arguidu provadu komete krime hasoru lezada no husu ba tribunál atu aplika pena multa US\$0.50 kada loron durante loron 60. Tribunál mós antisipa pena alternativu loron 40 iha prizaun karik arguidu la selu pena multa refere.

Entretantu, defeza husu ba tribunál atu aplika pena ne'ebé justu no adekuada ba arguidu bazeia ba sirkunstánsia atenuante sira hanesan arguidu foin primeiravés mai hatan iha tribunál, la repete ona ninia hahalok ne'e, servisu nu'udar agrikultór no sai sustentadór prinsipál ba família.

Desizaun

Depoide avalia faktu sira ne'ebé prodús durante julgamentu, tribunál prova katak arguidu foti ai-pedasuk boot ida no tuda dala ida iha lezada nia liman kabun sorin karuk. Tribunál mós prova katak arguidu uza besi baku dala ida iha lezada nia liman kabun sorin loos. Aleinde tribunál mós tetu sirkunstánsia atenuante sira hanesan arguidu la baku ona lezada, primeiravés mai tribunál no nu'udar ema ne'ebé mak iha responsabilidade hodi sustenta família. Bazeia ba konsiderasaun hirak-ne'e tribunál konklui prosesu ne'e no kondena arguidu ho pena prizaun fulan neen suspende ba tinan ida, inklui selu kustu judisiál US\$20.00.

6. Krime ofensa ba integridade física simples ho natureza violénsia doméstika

Nú. Prosesu	: 0016/18. VQSIC
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Domingos Goveia Barreto
Defeza	: Dr. Antonio Fernandes
Desizaun	: Pena prizaun fulan 6 suspende ba tinan 1

Iha 14 Juñu 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AS hasoru nia feen, iha Distritu Vikeke.

Akuzasaun Prokuradór

Prokuradór akuza arguidu katak iha 17 Abril 2017, oras tuku 18:00 lokraik, arguidu tuku dala rua iha lezada nia ulun parte kotuk, basa dala rua iha kanuruk, tuku dala rua iha reen-toos, tebe dala ida iha sorin loos no rasta lezada nia fuuk rezulta lezada monu ba rai. Antes kazu ne'e akontese lezada ba hasee arguidu ne'ebé tuur no telefone hela ema seluk iha estradaibun, nune'e arguidu fila tuir lezada ba uma no halo agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak arrepende ninia hahalok. Arguidu mós deklarata foin primeiravés mai hatan iha tribunál no di'ak malu ona ho lezada. Arguidu nu'udar agrikultór no nu'udar sustentadór prinsípál ba nia família. Entretantu, tribunál presinde deklarasaun lezada nian tanba arguidu konfesa totalmente ba ninia hahalok.

Alegasaun finál

Prokuradór konsidera arguidu provadu komete faktu sira iha akuzasaun hasoru nia feen ne'ebé tuir loloos arguidu tenke proteje. Tanba ne'e, husu ba tribunál atu kondena arguidu ho pena prizaun fulan sia suspende ba tinan ida.

Defeza husu ba tribunál atu konsidera sirkunstánsia atenuante sira hasoru arguidu hanesan arguidu foin primeiravés baku lezada, arrepende ninia hahalok no di'ak malu ona ho lezada. Tanba ne'e, husu ba tribunál atu aplika pena ne'ebé adekua ba arguidu.

Desizaun

Tribunál prova katak arguidu tuku duni dala rua iha lezada nia ulun parte kotuk, basa dala rua iha kanuruk, tuku dala rua iha reen-toos, tebe dala ida iha sorin loos no rasta lezada nia fuuk rezulta lezada monu ba rai. Tribunál prova katak antes kazu ne'e akontese, lezada ba hasee arguidu ne'ebé tuur iha Estrada ibun no telefone hela ba ema seluk. Aleinde tribunál mós prova arguidu arrepende ninia hahalok, di'ak malu ona ho lezada no primeiravés mai iha hatan tribunál. Bazeia ba prova no konsiderasaun ba sirkunstánsia sira ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida, inklui selu kustu judisiál US\$ 20.00.

7. Krime ofensa ba integridade fízika simples ho natureza violénsia doméstika

Nú. Prosesu	: 0011/18. LALMAR
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Ambrosio Rangel Freitas
Defeza	: Dr. Horta Ramos (advogadu ECM)
Desizaun	: Pena prizaun fulan 6 suspende ba tinan 1

Iha 14 Juñu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu BB hasoru nia feen, iha Distritu Lautem.

Akuzasaun Prokuradór

Prokuradór akuza arguidu katak iha 09 Novembru 2018, oras tuku 15:00 lokraik, arguidu no lezada diskute malu kona-ba lezada lakohi ba ajuda te'in iha seremónia ke'e família nia mate ruin. Hafoin arguidu tuku dala rua iha lezada nia reen-toos, tuku dala ida iha kanotak sorin loos no ka'er lezada nia liman dulas ba kotuk. Aktu sira ne'e, rezulta lezada sofre moras iha reen-toos, kanotak no liman.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak desde moris hamutuk ho lezada, arguidu foin primeiravés baku lezada. Tanba ne'e, arguidu arrepende ninia hahalok no to'o agora arguidu la baku tan ona lezada.

Aleinde ne'e, lezada kontinua konfirma faktu sira iha akuzasaun no konfirma mós arguidu nian deklarasaun katak arguidu foin primeiravés baku lezada no to'o agora arguidu la baku ona lezada.

Alegasaun finál

Prokuradór haktuir katak bazeia ba arguidu nia deklarasaun no lezada nia depoimentu ne'ebé konfirma kona-ba ba faktu hirak-ne'e, katak arguidu provadu komete krime hasoru lezada. Maski arguidu no lezada di'ak malu ona, prokuradór konsidera tenke iha prevensaun maka'as ba arguidu hodi garantia arguidu la repete ninia hahalok iha futuru. Tanba ne'e, husu ba tribunál atu aplika pena multa US\$0.50 durante loron 30 ho pena alternativu loron 20 iha prizaun bainhira arguidu la selu pena multa ne'e.

Enkuantu parte defeza haktuir katak arguidu konfesa integralmente ba faktu sira iha akuzasaun, arrepende ninia hahalok, di'ak malu ona ho lezada no durante sira moris hamutuk arguidu foin primeiravés baku lezada. Tanba ne'e, husu ba tribunál atu aplika pena admoestasaun ba arguidu.

Desizaun

Depoide avalia faktu hotu, tribunál prova katak arguidu tuku dala rua iha lezada nia reen-toos, tuku dala ida iha kanotak sorin loos no ka'er lezada nia liman dulas ba kotuk. Tribunál tetu mós ba sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada, foin primeiravés baku lezada no to'o agora la repete ninia hahalok. Bazeia ba konsiderasaun hirak-ne'e, tribunál kondena arguidu ho pena prizaun fulan neen suspende ba tinan ida inklui kondena arguidu selu kustu judisiál US\$ 20.00.

8. Krime ofensa ba integridade fízika simples ho natureza violénsia doméstika

Nú. Prosesu : 0022/18. BCBCV
Kompozisaun Tribunál : Singulár
Juis : Dr. Antonio Fonseca
Prokuradór : Dra. Remizia de Fatima da Silva
Defeza : Dr. Gregorio de Lima
Desizaun : Pena prizaun fulan 2 loron 20 suspende ba tinan 1 ho regra ba konduta

Iha 18 Juñu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CBS hasoru nia feen, iha Distritu Baukau.

Akuzasaun Prokuradór

Prokuradór akuza katak iha 14 Novembru 2018, oras tuku 14:00 lokraik, iha natar laran, arguidu ho lezada diskute malu relasiona ho arguidu duun lezada amante ho mane seluk. Hafoin ida-ne'e, arguidu tuda fatuk dala barak ba lezada maibé fatuk ida mak kona lezada nia ain fukun parte karuk no rezulta kanek no ran. Arguidu foti tan ai-suak atu baku lezada maibé la konsege tanba arguidu nia aman mai ka'er netik tiha arguidu nune'e lezada konsege halai ses tiha husi arguidu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Arguidu konfesa no rekoñese ninia hahalok sira tuir faktu iha akuzasaun no deklarata katak dezde moris hamutuk ho lezada iha tinan 2014 arguidu foin primeiravés halo agresaun hasoru lezada. Arguidu no lezada iha oan na'in ida no arguidu arrepende ninia hahalok. Arguidu hatutan katak depoisde akontesimentu lezada ba hela tiha ho nia inan-aman.

Aleinde ne'e, lezada kontinua konfirma ba faktu sira iha akuzasaun no deklarata katak lezada ba halo tratamentu iha Sentru Saúde Venilale, no moras kuaze semana ida mak rekoopera fali. Lezada konfirma mós ba arguidu nia deklarasaun katak depoisde akontesimentu lezada ba hela tiha ho nia inan-aman tanba arguidu nia família la simu ona lezada maski lezada hakarak nafatin moris hamutuk ho arguidu.

Alegasaun final

Prokurador haktuir katak arguidu provadu komete faktu sira iha akuzasaun bazeia ba arguidu nia konfisaun no lezada nia konfirmasaun ba faktu sira. Konsidera katak krime violénsia doméstika ne'ebé aas tebes, tenke foti medida ne'ebé forte hodi eduka arguidu no comunidade sira seluk iha

futuru. Reflete ba konsiderasaun sira ne'e hotu, husu ba tribunál atu kondena arguidu ba pena prizaun fulan neen suspende ba tinan ida.

Entretantu, defeza haktuir katak arguidu konfesa faktu hotu iha akuzasaun, arguidu foin primeiravés baku lezada no arrepende ona ninia hahalok. Tanba ne'e, husu ba tribunál atu fó pena ne'ebé adekua ba arguidu.

Desizaun

Depoide avalia faktu sira ne'ebé prodús iha julgamentu, tribunál prova katak arguidu tuda fatuk dala barak ba lezada no fatuk ida mak kona iha lezada nia ain fukun parte karuk. Arguidu foti tan ai-suak atu baku lezada maibé la konsege tanba arguidu nia aman mai ka'er netik tiha arguidu nune'e lezada halai tiha. Tribunál mós prova katak antes akontese aktu sira ne'e, arguidu diskonfia lezada iha amante ho mane seluk no to'og agora arguidu no lezada separa ona nu'udar feen no la'en.

Bazeia ba prova sira ne'e no sirkunstánsia atenuante sira hanesan arguidu konfesa, arrepende ninia hahalok, foin primeiravés halo agresaun hasoru lezada, tribunál kondena arguidu ho pena prizaun fulan rua liu loron rua nulu suspende ba tinan ida. Tribunál mós aplika regra ba konduta atu arguidu apresenta-an periodikamente kada fulan durante fulan tolu iha período primeiru ba iha tribunál.

9. Krime ofensa ba integridade física simples ho natureza violéncia doméstika

Nú. Prosesu	: 0156/18. BCBCV
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dra. Remizia de Fatima da Silva
Defeza	: Dr. Jose M. Guterres
Desizaun	: Pena prizaun tinan 1 suspende ba tinan 2

Iha 26 Juñu 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve DA hasoru nia feen, iha Distritu Baukau.

Akuzasaun Prokuradór

Prokuradór akuza katak iha 26 Novembru 2018, oras tuku 21:00 kalan, arguidu no lezada diskute malu kona-ba atu dulas haree kulit hafoin arguidu tebe dala rua iha lezada nia kotuk laran rezulta moras maka'as. Prokuradór mós akuza katak arguidu iha ona antesidente kriminál ba krime ofensa ba integridade física hasoru lezada. Arguidu mós la tau matan ba lezada ho sira nia oan.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa, no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa katak tebe duni dala rua iha lezada nia kotuk laran. Arguidu hatutan katak nia iha feen rua no lezada nu'udar feen ki'ik no agora dadaun oan sira husi lezada hela hamutuk ona ho arguidu tanba lezada mate ona. Enkuantu tribunál la bele rona ona lezada nia deklarasaun tanba lezada mate ona iha 26 Maiu 2019.

Alegasaun finál

Prokuradór haktuir katak arguidu konfesa integralmente ba faktu iha akuzasaun no arguidu iha antesidente kriminál hasoru lezada maibé arguidu la hatudu nia arepentimentu. Maski lezada mate ona maibé atu prevene arguidu la repete ninia hahalok iha futuru hasoru nia feen primeiru no oan sira, husu ba tribunál karik arguidu komete krime iha períodu suspensaun laran atu revoga tiha pena refere no akumulá iha pena ba krime foun.

Enkuantu defeza husu ba tribunál fó pena bazeia ba arguidu nia hahalok tanba konsidera arguidu konfesa ninia hahalok no arguidu mak responsável hodi sustenta oan sira husi feen primeiru no agora dadaun sustenta mós oan sira husi feen ki'ik.

Desizaun

Tribunál prova katak arguidu tebe dala rua iha lezada nia kotuk laran. Tribunál mós prova arguidu iha ona antesidente kriminál hasoru lezada no hetan pena multa US45.00. Tribunál prova katak arguidu la tau matan ba lezada ho sira nia oan. Bazeia ba faktu provadu sira ne'e no tetu ba sirkunstánsia katak arguidu mak sustenta feen boot ho nia oan no agora dadaun tau matan mós ba oan sira husi feen ki'ik. Depoide halo apresiasaun ba faktu provadu sira ne'e, tribunál kondena arguidu ho pena prizaun tinan ida suspende ba tinan rua.

10. Krime arma brankas no krime ofensa ba integridade fízika simples

Nú. Prosesu	: 0133/18. BCBCV
Kompozisaun Tribunál	: Koletivu
Juis	: Dr. Jose Escurial, Dr. Hugo da Cruz Pui, Dr. Jose Quintão
Prokuradór	: Dr. Gustavo A. M. da Silva
Defeza	: Dr. Jose M. Guterres
Desizaun	: Absolve

Iha 27 Juñu 2019, Tribunál Distritál Baukau prezide julgamentu leitura akordaun ba krime arma brankas no ofensa ba integridade fízika simples ne'ebé envolve arguidu Olderico Elias Freitas hasoru Natalino Antonio Guterres, iha Distritu Baukau.

Akuzasaun Prokuradór

Prokuradór akuza arguidu katak iha 21 Outubru 2018, oras tuku 15:00 lokraik, arguidu hasai tudik iha kanotak no sona ba iha lezadu nia hirus-matan maibé lezadu sata netik tiha ho nia liman loos rezulta liman loos kanek no ran. Hafoin ne'e, lezadu halai ba nia uma no husu ajuda família tula lezadu ba Ospital Referral Baukau. Antes kazu ne'e akontese, lezadu ho motor tula nia tian ba partisipa misa matebian iha kapela no bainhira lezadu fila iha dalan klaran arguidu ho motor hapara tiha lezadu. Arguidu tuun husi nia motor, hasai tudik iha kanotak no sona kedas lezadu.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no kontra artigu 2(1 letra b) no artigu 20(1) hosi Lei Nú. 5/2017 kona-ba krime arma brankas.

Produsaun ba prova sira

Iha julgamentu, arguidu rejenta totalmente ba faktu hotu no deklarata katak arguidu ho nia família atu ba misa matebian nian iha Kapela no arguidu ho motor halai uluk maibé bainhira to'o iha dala klaran besik Kapela, lezadu ho motor hapara tiha arguidu no diskute malu ho arguidu. Lezadu tuun husi motor, hasai tudik atu sona arguidu maibé la konsege tanba arguidu tebe tiha lezadu nia liman karuk ne'ebe ka'er tudik ne'e nune'e tudik kona fali ba iha lezadu nia liman parte loos. Hafoin lezadu halai no husik hela nia motor.

Entretantu lezadu kontinua konfirma faktu sira iha akuzasaun katak arguidu atu sona duni nia iha hirus-matan maibé tanba lezadu sata-netik ho liman nune'e tudik kona fali iha lezadu nia liman sorin loos rezulta kanek no ran.

Testemuña Francelina Maria da Costa nu'udar arguidu nia feton no testemuña Ovelia Freitas nu'udar arguidu nia feen hato'o depoimentu hanesan katak momentu ne'ebá sira aluga mikrolet atu ba tuir misa matebian nian iha Kapela no testemuña na'in rua mak tuur iha kareta oin. Iha dala klaran testemuña haree lezadu hapara tiha arguidu nia motor no sira diskute malu, hafoin lezadu hasai tudik no atu sona arguidu maibé la konsege tanba arguidu tebe tiha lezadu nia liman ne'ebé kaer tudik ne'e. Testemuña ho família sira ne'ebé iha kareta laran hakilar bainhira haree asaun ne'e.

Alegasaun final

Prokuradór haktuir katak maski arguidu nega faktu maibé lezadu konfirma faktu sira iha akuzasaun. Tribunál labele fiar ba testemuña sira tanba sira iha relasaun besik liu arguidu. Tanba ne'e, husu ba tribunál atu kondena arguidu tuir konviksaun tribunál.

Entretantu defeza husu ba tribunál atu absolve arguidu hosi akuzasaun prokuradór tanba iha produsaun ba prova sira arguidu deklarata katak lezadu mak atu sona arguidu no reforsa mós husi testemuña sira.

Desizaun

Depoisde avalia faktu sira, tribunál konsidera liu ba iha arguidu nia deklarasaun no testemuña sira nia depoimentu katak lezadu mak hapara arguidu no uza nia tudik sona ba arguidu. Maibé lezadu la konsege sona arguidu tanba arguidu tebe tiha lezadu nia liman no tudik refere kona fali lezadu nia liman rezulta kanek no ran. Bazeia ba konsiderasaun hirak ne'e, tribunál absolve arguidu husi prosesu refere.

11. Krime ofensa ba integridade física grave

Nú. Prosesu : 0162/18. BCBCV
Kompozisaun Tribunál : Koletivu
Juis : Dr. Jose Escurial, Dr. Hugo da Cruz Pui no Dr. Jose Quintão
Prokuradór : Dr. Gustavo A. M. da Silva
Defeza : Dr. Antonio Fernandes
Desizaun : Pena prizaun tinan 3 suspende ba tinan 3 no indemnizasaun sivíl US\$500.00.

Iha 27 Juñu 2019, Tribunál Distritál Baukau prezide julgamentu leitura akordaun ba krime ofensa ba integridade física grave ne'ebé envolve arguidu Nelson Ximenes Neves no Elvis Ximenes Nunes hasoru Fernando Marques Perreira, iha Distritu Baukau.

Akuzasaun Prokuradór

Prokuradór akuza katak iha 22 Novembru 2018 iha oras meiodia, lezadu iha nia uma laran no rona kalen uma nian tarutu. Lezadu ho nia banin feto, Mariana Ximenes sai ba li'ur no haree arguidu Nelson Ximenes Neves ka'er hela ai-pedasuk ida no arguidu Elvis Ximenes Neves hamriik iha uma oin. Hafoin arguidu Nelson Ximenes Neves baku dala ida iha lezadu nia ulun rezulta oin nakukun no monu ba rai. Entretantu arguidu Elvis Ximenes Neves tuda fatuk dala ida kona lezadu nia ain sorin karuk to'o monu ba rai. Lezadu sofre ain tohar no ba halo tratamentu iha Ospital Rejionál Baukau durante semana rua no depois ida-ne'e lezadu kontinua halo tratamentu ba nia ain ho aimoruk tradisionál no gasta osan US\$500.00.

Prokuradór akuza arguidu sira kontra artigu 146 (b no c) KP kona-ba ofensa ba integridade física grave ho nia moldura penál husi tinan 2 to'o tinan 8 prizaun.

Produsaun ba prova sira

Iha julgamentu, arguidu Nelson Ximenes Neves no Elvis Ximenes Neves konfesa faktu sira no deklarata katak momentu ne'ebá arguidu sira ba iha lezadu nia uma hodi husu tuir tanbasá lezadu baku sira nia inan. Arguidu sira mós deklarata katak sira bolu lezadu ho liafuan *panleiru* no lezadu

sai husi uma laran ho kedan katana no ai-pedasuk ida iha liman. Lezadu uza ai-pedasuk baku ba arguidu Elvis Ximenes Nunes ho nune'e arguidu Nelson Ximenes Neves mós foti ai-pedasuk ida iha lezadu nia uma oin no baku dala ida iha lezadu nia kanuruk rezulta lezadu monu ba rai. Arguidu Nelson Ximenes Neves haree lezadu hamrik no se katana atu taa arguidu Elvis Ximenes Nunes tanba ne'e arguidu Elvis Ximenes Nunes foti fatuk tuda dala ida iha lezadu nia ain sorin karuk rezulta lezadu monu ba rai.

Entretantu lezadu kontinua konfirma faktu sira iha akuzasaun inklui kustu ne'ebé nia gasta hodi sosa aimoruk tradisionál hamutuk US\$500.00.

Testemuña Mariana Ximenes nu'udar lezadu nia banin feto depoimentu katak testemuña no lezadu rona ema tuda uma nune'e sira halai sai mai liur no haree arguidu sira iha hela uma oin. Testemuña haree arguidu Nelson Ximenes Neves uza ai baku dala ida iha lezadu nia ulun hafoin arguidu Elvis Ximenes Nunes ho fatuk tuda dala ida iha lezadu nia ain sorin karuk. Depoizde haree ne'e, testemuña sente ta'uk no halai tama fali ba uma laran.

Alegasaun final

Prokuradór husu ba tribunál atu kondena arguidu tuir konviksaun tribunál nian bazeia ba rezultadu produsaun ba prova sira inklui konsidera lezadu nia kondisaun ain ne'ebé to'o agora sei moras no prejudika tebes lezadu nu'udar agrikultór.

Entretantu defeza husu ba tribunál atu decide pena ne'ebé justu ba arguidu sira tanba arguidu sira konfesa sira nia hahalok no motivasaun husi akontesimentu ne'e tanba lezadu mak baku uluk arguidu sira nia inan.

Desizaun

Tribunál prova katak arguidu Nelson Ximenes Neves baku dala ida iha lezadu nia ulun rezulta lezadu oin nakukun no monu ba rai. Tribunál mós prova katak arguidu Elvis Ximenes Neves tuda fatuk dala ida no kona iha lezadu nia ain sorin karuk rezulta tohar no halo lezadu monu ba rai. Lezadu ba halo tratamentu iha Ospital Rejionál Baukau durante semana rua no kontinua halo tratamentu uza aimoruk tradisionál ne'ebé gasta osan US\$500.00. Bazeia ba prova sira ne'e, tribunál kondena kada arguidu ho pena prizaun tinan tolu suspende ba tinan tolu no kondena mós arguidu sira selu indemnizasaun sivíl ba lezadu hamutuk US\$500.00.

12. Krime arma brankas

Nú. Prosesu	: 0016/17. LALAT
Kompozisaun Tribunál	: Koletivu
Juis	: Dr. Hugo da Cruz Pui, Dr. Antonio Fonseca no Dr. Jose Quintão
Prokuradór	: Dr. Ambrosio Rangel Freitas
Defeza	: Dr. Antonio Fernandes

Desizaun

: Pena prizaun tinan 4

Iha 27 Juñu 2019, Tribunál Distritál Baukau prezide julgamentu leitura akordaun ba krime arma brankas ne'ebé envolve arguidu Nelson Ximenes Fernandes, iha Distritu Lautem.

Akuzasaun Prokuradór

Prokuradór akuza katak iha 27 Setembru 2017, oras tuku 18:00 lokraik, lezadu (Alfredo da Costa) rona nia kalen uma nian tarutu no rona mós ema hakilar no tolok iha li'ur. Tanba ne'e lezadu sai ba li'ur no haree arguidu iha hela nia uma oin. Lezadu dehan ba arguidu katak "*sei ó mane mai de'it tanbasá tuda hau nia uma?* Nune'e, sira diskute malu to'o Carlos Monteiro mai hafahe tiha arguidu ho lezadu. Arguidu ba tiha no la kle'ur arguidu mai fali iha lezadu nia uma no ka'er kedas ho fiska no rama ambon no tiru dala rua ba lezadu maibé la kona tanba lezadu hases tiha nia-an.

Prokuradór akuza arguidu kontra artigu 19 hosi Lei Nú. 5/2017 kona-ba Lei Arma Brankas.

Produsaun ba prova sira

Arguidu deklara katak arguidu ba sosa sigaru iha kioske ne'ebé besik iha lezadu nia uma no haree lezadu sai husi nia uma laran no hakilar husu se mak tuda nia nia uma no liman ka'er/buti kedas ba arguidu nia kakorok. Tanba ne'e, arguidu dehan ba lezadu katak "*tiu ema mós tuda kona ha'u*". Hafoin arguidu liki-an no haree lezadu nia família ho katana duni arguidu. Arguidu hatutan katak tanba ema sira duni nia ho katana mak halo arguidu hasai rama ambon no tiru sae dala rua hafoin ema sira ne'ebé duni nia halai fila.

Relasiona ho rama ambon ne'e, arguidu deklara katak arguidu tuku rasik rama ambon ne'e desde tinan 2016 no uza rama ambon ne'e hodi kasa animál. Arguidu la hatene kona-ba lei arma brankas ne'ebé bandu kona-ba uja rama ambon nu'udar krime. Arguidu deklara katak arrepende ninia hahalok no foin primeiravés hatan iha tribunál.

Entretantu lezadu depoimenta katak momentu lezadu fó han hela fahi, arguidu ho kondisaun lanu hase lezadu katak fó han hela fali ka. Lezadu la simu ho arguidu hase nia hanesan ne'e no diskute malu kedas ho arguidu. Lezadu rekoñese katak nia ka'er duni arguidu nia kakorok. Entretantu kona-ba arguidu tiru rama ambon, lezadu deklara katak nia la hatene se nia rama ambon mak monu iha estrada no la hatene se mak tiru rama ambon to'o iha estrada ne'e. Bainhira nia haree rama ambon ne'e, lezadu ba informa kedas iha polísia. Deklarasaun lezadu nian ne'e kontráriu ho akuzasaun.

Alegasaun final

Prokurador haktuir katak arguidu mak fabrika rasik rama ambon no rai iha uma. Arguidu sempre uza rama ambon ba kasa no hahalok ne'e konsidera nu'udar krime arma brankas. Tanba ne'e, husu ba tribunál atu aplika pena prizaun tinan haat ba arguidu.

Aleinde ne'e, parte defeza haktuir katak arguidu uza rama ambon ne'e antes lei arma brankas aplika tanba arguidu hela iha área rural no laiha koñesimentu kona-ba lei arma brankas. Arguidu mós durante ne'e uza rama ambon ba kasa animál. Tanba ne'e, entrega ba tribunál atu dieside tuir tribunál nia konviksaun.

Desizaun

Depoide avalia faktu sira hotu, tribunál prova katak arguidu rasik fabrika rama ambon no rai rama ambon ne'e iha nia uma ho tempu kleur, desde 2016 no foin hapara nia atividade ne'e depoide kazu ida ne'e prosesa tuir dalan formal. Ho krime arma brankas liu-liu rama ambon ne'ebé as tebes iha teritóriu Timor, tribunál konsidera katak arguidu mós kontribui ba akontesimentu krime arma brankas ne'ebé liga ho rama ambon. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, foin primeiravés mai hatan iha tribunál, ho nune'e tribunál kondena arguidu ho pena efetiva tinan haat iha prizaun.

Atu hetan informasaun kle'an liu tan favor kontaktu:

Casimiro dos Santos

Diretór Interino Ezekutivu JSMP

Diresaun e-mail: santos.cas76@gmail.com

Website: <http://jsmp.tl/>

Telefone:3323883 | 77257466